

ԱԶԳ-ՊԵՏՈՒԹՅԱՆ ԳԱՂԱՓԱՐԱԽՈՍԱԿԱՆ  
ՀԻՄՔԵՐԸ ԵՎ ԳՈՐԾԱՌԱԿԱՆ  
ԱՌԱՆՁՆԱՀԱՏԿՈՒԹՅՈՒՆՆԵՐԸ

*Կարինե Հակոբյան՝*

Ազգ-պետության և նրա ֆիզիկական ու հոգևոր տիրույթում ձևավորված քաղաքական ազգի<sup>1</sup> գործառական առանձնահատկությունները պայմանավորված են ժողովրդավարության, ազատականության և ազգայնականության փոխազդեցությունների բնույթով, իսկ դրանք, իրենց հերթին, որպես գաղափարախոսություններ և կառավարման համակարգի բաղադրիչներ, բխում են ազգ-պետության նպատակներից և բարձրագույն արժեքներից (հավասարություն, ազատություն, ազգային ինքնավարություն և ինքնության պահպանում): Որքան էլ համաշխարհայնացման (գլոբալացման) գործընթացների կողմնակիցները փորձում են ընդլայնել ժողովրդավարության գործառության շրջանակները, այդուհանդերձ, պատմական փաստերն ու ժամանակակից իրադարձությունները վկայում են, որ ազգ-պետությունից դուրս ժողովրդավարությունը կորցնում է կառավարման իր ներունակությունները: Անգլիացի հասարակագետ և փիլիսոփա Մայքլ Մանի կարծիքով՝ ժամանակակից ժողովրդավարությունը կարող է արդյունավետ գործել միայն ազգ-պետության շրջանակում: Նա գրում է.

---

<sup>1</sup> ԵՊՀ սոցիալական փիլիսոփայության և բարոյագիտության ամբիոնի հայցորդ, «Բարեփոխում» կրթամշակութային հասարակական կազմակերպության նախագահ:

<sup>1</sup> Քաղաքական ազգն ազգային ինքնորոշման իրավունքի հիման վրա քաղաքական ինքնավարություն ձեռք բերած (ազգ-պետություն) ժամանակակից ազգն է, որը քաղաքական սուբյեկտ է:

«Եվրամիությունն այսօր ավելի միտված է դեպի վարչարարությունը, քան ժողովրդավարությունը: Կարո՞ղ է արդյոք ժամանակակից ժողովրդավարությունը վերահսկել Եվրամիության գործողությունները. իհարկե՝ ոչ, որովհետև այն ստեղծվել է ժամանակակից ազգ-պետության ձևաչափի մեջ և դրա գործառույթն է» [1, շ. 399]: Այդ միտքն է զարգացնում նաև քաղաքագետ Մամուել Հանթինգթոնը՝ նշելով, որ «ժամանակակից ժողովրդավարությունն» ընդհանրական հասկացությունն է, այլ վերաբերում է միայն ազգ-պետությանը: Դրան պետք է ավելացնել, որ ազգ-պետություններում ժողովրդավարությունը հաստատվել է որպես իրավահաջորդ ռեժիմ [2, շ. 25]: Այսինքն՝ ժողովուրդները հավասարության և ազատության գաղափարներով տոգորված, ազգային ազատագրական պայքարի արդյունքում և ազգային ինքնորոշման իրավունքի հիման վրա հիմնադրել են ազգ-պետությունները, իսկ այնուհետև որպես կառավարման համակարգ հաստատվել է ազատական-ժողովրդավարությունը:

Ժողովրդավարության հազարամյակների պատմությունը համընթաց և ներդաշնակ զարգացման ճանապարհի չէ, այլ հասարակության ու պետության միջև գոյություն ունեցող բարդ փոխհարաբերությունների, հասարակական ընդվզումների և պայքարի պատմություն: Պետք է նկատել, որ «հասարակական դաշինքն» ի սկզբանե խախտվել է ինչպես պետության կողմից, այնպես էլ հասարակության ներսում: Այդ առումով, ժողովրդավարությունը կարելի է համարել այն գործիքը, որի միջոցով փորձ է արվում իրագործել ազգ-պետության երկու գլխավոր գործառույթներից մեկը. հասարակության անվտանգության և բարեկեցության ապահովումը (մարդու հիմնարար ազատությունների ու իրավունքների պաշտպանությունը և հիմնական պահանջումների բավարարումը): Մյուս գործառույթն ազգային ինքնավարության և ազգային ինքնության պահպանումն է (ազգային գաղափարախոսության և մշակութային քաղաքականության միջոցով):

Լուսավորական և ռոմանտիզմի փիլիսոփայության, անգլիական և ֆրանսիական հեղափոխությունների և նոր ձևավորվող արդյունաբերական հասարակության ժամանակաշրջանից մինչև այսօր ժողովրդավարացման գործընթացը վերելքների և անկումների երկարատև ճանապարհ է անցել: Հանթինգթոնի դասակարգմամբ՝ ժողովրդավարացման «առաջին ալիքը» (1828-1926) եղել է ամենից տևականը, գրեթե մեկ դար, որին, սակայն, հաջորդել են ժողովրդավարացման նահանջի տարիները (1922-1942): Այնուհետև «երկրորդ ալիքը» (1943-1962) տևում է ավելի կարճ, և դարձյալ այդ ժամանակահատվածին հաջորդում են նահանջի տարիները: Քսաներորդ դարի ավարտը նշանավորվում է երրորդ՝ հուժկու «ալիքով», որն արդեն կրում է համաշխարհային բնույթ (1974-1990): Ընդամենը տասնհինգ տարվա ընթացքում, մինչև 1991 թվականը ժողովրդավարությունը հաստատվում է Հարավային Եվրոպայում, Լատինական Ամերիկայում, հասնում է Ասիա և կարողանում Սովետական Միությունում փլուզել սոցիալիստական կարգերը: Այդուհանդերձ, ժողովրդավարացման «երրորդ ալիքը», որն ըստ էության որպես անավարտ ծրագիր շարունակվում է առայսօր, հեղինակին լավատեսության առիթ չի տալիս, քանի որ գործընթացներին զուգընթաց՝ ուժեղանում են հակազդեցությունը և ժողովրդավարական գաղափարների նկատմամբ դիմադրությունը [2, c. 26]: Ինչպես յուրաքանչյուր կիսատ թողնված գործ, այնպես էլ թերի ժողովրդավարությունը ենթակա է տարաբնույթ շեղումների և կարող է բազմաթիվ արատավոր երևույթների սկզբնապատճառ դառնալ: Իսկ ժողովրդավարությունը թերի է, երբ ձևավորված չէ քաղաքացիական հասարակությունը, չկա անկախ մամուլ, տարանջատված չեն իշխանության գործադիր, օրենսդիր և դատական ճյուղերը և չկա իշխանությանը հակակշիռ և վերահսկողական գործառույթներ ունեցող քաղաքական ընդդիմություն: Դեռևս Արիստոտելը որպես կառավարման հիմնական ձևեր նշում էր մո-

նարխիան, արխատկրատիան և պոլիտիան, իսկ շեղումներ էր համարում տիրանիան, օլիգարխիան և դեմոկրատիան: Սակայն կան պատմական փաստեր, որոնք վկայում են ժողովրդավարական հաջող կառավարման մասին, ինչպես անտիկ, այնպես էլ ավելի վաղ ժամանակաշրջանում: Այս առումով տեղին է հիշել շումերական Էպոսը (մ.թ.ա 2800թ.), որում Գիլգամեշը անմահության գաղտնիքը որոնելու նպատակով գնում է Արարտու երկիր (աշխարհագրորեն համապատասխանում է պատմական Հայաստանի տարածքին) և վերադառնալով պատմում է, որ այդ երկրում թագավորը, որը նաև ժողովրդի հոգևոր առաջնորդն է, ընտրվում է չորս տարով և նրա իշխանությունը սահմանափակված է ավագանու կողմից (նույնպես ընտրված): Իսկ Սենեկան իր նամակներից մեկում, անդրադառնալով ժողովրդավարության գաղափարին, հիշում է «ոսկե դարը», երբ «ղեկավարել են իմաստունները, և երբ ղեկավարել չէր նշանակում իշխել, այլ նշանակում էր կատարել պարտականություն: Ոչ ոք չէր փորձում իշխանություն բանեցնել նրանց նկատմամբ, ովքեր իրեն շնորհել էին այդ իշխանությունը» [3, с. 242]: Եթե դեռևս հազարամյակներ առաջ հնարավոր է եղել ժողովրդավարական եղանակով կառավարել այնպես, որ այդ ժամանակաշրջանը համարվել է «ոսկե դար», ապա ինչո՞ւ այսօր դա հնարավոր չէ իրականացնել. որո՞նք են արգելքները: Ինչո՞ւ մի գաղափարախոսություն, որը, թվում է, մարմնավորում է մարդու և ժողովուրդների լավագույն իդեալը, այդքան դժվարությամբ է հարթում իր ուղին: Ժողովրդավարացման բնույթը և նրանում տեղ գտած շեղումների պատճառները բացահայտելու համար նախևառաջ անհրաժեշտ է վերլուծել և փորձել հասկանալ «մեծամասնության» և «փոքրամասնության» միջև (ոչ միայն քաղաքական առումով) գոյություն ունեցող հակասությունների բնույթը և պատճառները: Գործառական մոտեցմամբ՝ ժողովրդավարությունը մեծամասնության կամքի իրագործումն է՝ փոքրամասնության իրավունք-

ները հաշվի առնելով: Գերմանացի փիլիսոփա Յուրգեն Հաբերմասի կարծիքով՝ ժողովրդավարության ուսումնասիրության բնագավառում այսօր դեռևս բանավեճի թեմա է, թե ինչպես համատեղել ազատությունն ու հավասարությունը, մեծամասնության և փոքրամասնության իրավունքներն ու շահերը, ազգային համաձայնությունը և բազմամշակութայնությունը: Հաբերմասի կարծիքով՝ ազատականներն իրավական դաշտում կարևորում և ինստիտուցիոնալացնում են բուլդոլի համար հավասար ազատությունները: Նրանց համար մարդու իրավունքը գերակա արժեք է ժողովրդավարության նկատմամբ, ինչպես նաև սահմանադրությունն առաջնահերթ է ժողովրդի հավաքական կամքի նկատմամբ: Մյուս կողմից՝ էգալիտարները (հավասարապաշտները) գտնում են, որ ազատ և հավասար մարդկանց հավաքականությունն է, որ ձևավորում է ինքնավար կամք, և մարդու իրավունքները պետք է ենթակա լինեն ժողովրդի այդ ինքնավար և հավաքական կամքին [4, c. 33]: Դեռևս 18-րդ դարի կեսերին Ժան-ժակ Ռուսոն նշում է, որ օրենսդիր մարմինը ենթակա է ժողովրդի օրինաստեղծ կամքին: Նա օրենքները ստորաբաժանում է չորս խմբի. քաղաքական, որոնցով կարգավորվում են պետության կամ ամբողջի և ժողովրդի հարաբերությունները, քաղաքացիական, որոնցով պետությունը պաշտպանում է իր անդամների իրավունքներն ու ազատությունները, այնուհետև դրանց ածանցյալ՝ քրեական օրենսդրությունը և, վերջապես, չորրորդը, որը Ռուսոն ամենից ավելի է կարևորում և համարում է պետության իրական սահմանադրությունը. դա այն է, ինչը գտնվում է քաղաքացիների հոգում [5, էջ 129-130]: Խոսքը վերաբերում է ազգային սովորույթներին և բարոյական նորմերին, այսպես կոչված չգրված օրենքներին, որոնք որոշիչ նշանակություն ունեն օրենսդրության ձևավորման գործում: Եթե ժողովուրդն է որոշում երկրի օրենսդրությունը, ուրեմն օրենքները բխում են ժողովրդի և յուրաքանչյուր քաղաքացու շահերից: Բայց դա հնարավոր է միայն

այն դեպքում, երբ հասարակության մեջ կա ազգային և քաղաքացիական համաձայնություն: Սակայն խնդիրը հենց այդ համաձայնության պակասն է: Ըստ էության, եթե կա սոցիալական համերաշխություն, օրենքներն ինքնըստինքյան կբխեն հասարակության յուրաքանչյուր անդամի շահերից, և հետևաբար՝ ազատական և ժողովրդավարական սկզբունքների միջև հակասություն չի առաջանա: Սակայն չպետք է մոռանալ, որ ազատականությունը ոչ թե ազգային համաձայնության և սոցիալական համերաշխության, այլ մրցակցության գաղափարախոսություն է: Իսկ մրցակցության մեջ բարոյական նորմերով առաջնորդվելու համար անհրաժեշտ են անձնական շահին հակակշիռ ուժեղ հասարակական լծակներ: Հետևաբար, ժողովրդի «օրենսդիր կամքը» փաստացիորեն մնում է բարի, սակայն անիրագործելի ցանկություն: Այս հարցերի շուրջ անդրադառնալով Իմանուիլ Կանտի հայացքներին՝ Հաբերմասը նկատում է, որ դրանցում ամենից կարևորը մարդու իրավունքների (ազատականության) և ժողովրդի իրավունքների (ժողովրդավարության) համատեղելիության հնարավորության գաղափարն է: Քաղաքացիների հավաքական կամքը կարող է դրսևորվել միայն համընդհանուր շահերից բխող օրենսդրությամբ, և այն միայն այնպիսի որոշումներ պետք է կայացնի, որոնք կերաշխավորեն հավասար ազատությունների բոլորին: Համաձայն այդ հայեցակարգի՝ ինքնավար ժողովրդավարական պետությունը պետք է միաժամանակ և՛ ընդհանուր՝ հասարակական, ազգային շահերի պաշտպանը լինի, և՛ մարդու իրավունքների [4, c. 34]: Անշուշտ, անհատի իրավունքների ու ազատությունների և ազգային շահի կամ «հավաքական կամքի» միջև գոյություն ունեցող հակասությունը ժողովրդավարացման ճանապարհին և քաղաքական ազգի արդյունավետ գործառության մեջ կարևոր խոչընդոտ է: Եվ իհարկե, կենսական հարցերի շուրջ ազգային համաձայնությունը ժողովրդավարության հաստատման և ամրապնդման կարևոր պայմաններից մեկն է: Ուշա-

գրավ է ամերիկացի հասարակագետ և տնտեսագետ Յոզեֆ Շումպե-տերի դիտարկումը ժողովրդավարության և ազգային համաձայնու-թյան կապի վերաբերյալ: Նրա կարծիքով՝ կառավարման ժողովրդա-վարական եղանակը երբեք չի կարող ամբողջ թափով աշխատել, եթե ազգի ներսում առաջնահերթ հարցերի վերաբերյալ կա տարաձայնու-թյուն [6, c. 147]: Սովորաբար ազգերը հասնում են ներքին համերաշ-խության և համաձայնության երկարատև, համատեղ կյանքի և պայ-քարի արդյունքում: Էթնիկ, մշակութային ազգերի պարագայում հա-մախմբման գործոն են հանդիսացել ընդհանուր պատմությունը, լե-զուն, մշակույթը, իսկ նոր ժամանակներում կազմավորված ժամանա-կակից ազգերի դեպքում սոցիոմշակութային բաղադրիչին գումար-վում և կարևոր նշանակություն է ձեռք բերում քաղաքական, քաղա-քացիական մշակույթը: Ցանկացած դեպքում ակնհայտ է, որ ժողո-վրդավարության ամրապնդման համար անհրաժեշտ է, որ պետքի հա-սարակությունն առաջնորդվի բոլորի համար ընդհանուր արժեքային համակարգով և ունենա ընդհանուր նպատակ: Երբ արժեքների շուրջ չկա համաձայնություն, ժողովրդավարությունը վտանգված է: Հասա-րակագետ Մայքլ Լինդի կարծիքով՝ բազմազգ պետությունը և ժողո-վրդավարությունն ուղղակի անհամատեղելի են, և բոլոր այն պետու-թյունները, որոնք փորձում են համատեղել այդ երկու երևույթները, շատ արագ համոզվում են, որ դա անհնարին է [7, c. 87-100]: Սակայն, եթե ժողովրդավարացման հաջողության համար կարևոր գործոն են ազգային միասնությունն ու համաձայնությունը, ապա ազգային հա-մախմբման համար կարևոր նախապայման են սոցիալական արդա-րությունը և ապահովությունը: Երկրներում, որտեղ կա սոցիալական բևեռացում, խոցելի է դառնում ազգային համախմբվածությունը, և ժո-ղովրդավարական գործընթացները բախվում են անհաղթահարելի արգելքների: Ժողովրդավարության և ազատականության փոխազդե-ցությունների բնույթին անդրադարձել է նաև գերմանացի քաղաքա-

գետ Ֆիլիպ Շմիտերը, որի կարծիքով՝ «ազատականությունը՝ որպես ազատության հայեցակարգ և քաղաքական տնտեսության ուսմունք, թեև շատ երկրներում առաջացել է ժողովրդավարության հետ միաժամանակ, բայց որևէ կապ դրա հետ չունի» [8, c. 11]: Ազատականության և ժողովրդավարության անհամատեղելիության հիմքում գործողության սուբյեկտի տարբերությունն է. ազատականության համար այդ սուբյեկտն անհատն է, իսկ ժողովրդավարության համար՝ ժողովուրդը: Իսկ գերմանացի իրավաբան և փիլիսոփա Կարլ Շմիդտի կարծիքով՝ միավորվելով ժողովրդավարությանը, ազատականությունը դավաճանել է ինքն իրեն և դրանով իսկ պարտվել է: Ըստ Շմիդտի՝ ազատականները կապվել են բացարձակ ոչ ազատական և ըստ էության դեպի միատարր իշխանության տանող ժողովրդավարական ուժերի հետ: Նրա կարծիքով՝ հավասարությունը և հասարակության միատարրությունը ժողովրդավարության անհրաժեշտ նախապայմաններն են, իսկ միատարրություն՝ նշանակում է պատկանել նույն ազգին և ունենալ իրավունքներ՝ որպես տվյալ ազգ-պետության քաղաքացի: Գիտնականը նաև նշում է, որ միատարրությունը ժողովրդավարության պայմաններում իրավունքներով օժտում է ազգին և ոչ թե մարդկությանը [9]: Ժողովրդավարությունը, փաստորեն, օժանդակում է ազգային հավաքականության ձևավորմանը և արդյունավետ գործում է միատարր ազգ-պետության պայմաններում, իսկ ազատականությունը, հակառակը՝ նպաստում է ազգային տարանջատմանը և համաշխարհայնացման գործընթացներին: Եվ սակայն Շմիդտի այն դիտարկումը, թե ազատականության և ժողովրդավարության միջև պայքարում պարտվում է ազատականությունը, համոզիչ չէ: Բազմաթիվ օրինակները վկայում են հակառակի մասին, երբ տուժում է ժողովրդավարությունը: Իսկ ընդհանրապես, երկար ժամանակահատվածի մեջ, երբ չկա վերոնշյալ ազգային համաձայնությունը, պարտվում են երկուսն էլ: Հավասարության և ազատու-



թյան համատեղելիության հարց կարող էր չառաջանալ, եթե ժամանակի ընթացքում հավասարության գաղափարը, որի վրա խարսխված է ժողովրդավարությունը, չկորցնէր առաջնահերթ նշանակությունը, որով, ի դեպ, պայմանավորված էին ժողովրդավարացման «առաջին փուլի» հաջողությունն ու երկարատևությունը, ինչպես նաև Արևմտյան Եվրոպայի ազգ-պետությունների և հատկապես Ամերիկայի Միացյալ Նահանգների զարգացումը բոլոր ասպարեզներում:

19-րդ դարի 30-ական թթ. ֆրանսիացի նշանավոր քաղաքագետ և փիլիսոփա Ալեքսիս դե Տոկվիլը «Ժողովրդավարությունը Ամերիկայում» գրքում գրում է. «Այլևս դժվար չէ եզրակացնել, թե ինչ ահռելի ազդեցություն ունի այդ առաջնահերթ գաղափարը (հավասարությունը) հասարակական կյանքի բոլոր ոլորտներում: Այն ուղղորդում է հասարակական կարծիքը և երկրի օրենսդրությունը, այն ստիպում է նրանց, ովքեր դեկավարում են երկիրը, ընդունել լրիվ նոր բարոյական նորմեր, իսկ նրանց, ովքեր դեկավարվում են՝ նոր կենսակերպ: Այնուհետև, հավասարության սկզբունքի ազդեցության շրջանակն ընդլայնվելով՝ ընդգրկում է քաղաքական բարքերն ու իրավական նորմերը, տարածվում է ոչ միայն կառավարման համակարգի, այլև ամբողջ հասարակության վրա՝ ձևավորելով կարծիք, վերաբերմունք, որոշակի զգացմունքներ, սովորույթներ: Ավելին, այդ գերակա գաղափարն ամեն ինչ անուղղակիորեն ձևափոխում և համապատասխանեցնում է իրեն» [10, c. 1]: Ժամանակակից քաղաքական իրադարձությունները փաստում են, որ հավասարության և ազատության կամ ժողովրդավարության և ազատականության միջև երկարատև պայքարում հավասարության գաղափարն աստիճանաբար ավելի նսեմացվում է, և ժողովրդավարությունը զիջում է դիրքերը: Երբ ազգ-պետության գաղափարական հենասյուների միջև, որոնք առնվազն երեքն են (ժողովրդավարություն, ազատականություն, ազգայնականություն) բացակայում է համաձայնությունը՝ դրանցից որևէ մեկի գե-

րակայության պատճառով, խախտվում են համակարգի հավասարակշռությունը և արդյունավետ գործառնությունը: Օրինակ, երբ Հայաստանի անկախ պետականության հաստատման առաջին տարիներին քաղաքական դեկավար ուժերը հրաժարվեցին ազգային գաղափարախոսությունից, որի շնորհիվ իրենք եկել էին իշխանության, և այն չընդունեցին որպես պետական քաղաքականության բաղադրիչ, դա խախտեց ազատականության և ժողովրդավարության միջև հավասարակշռությունը, քանի որ ազգայնականությունը ժողովրդավարության համար հենարան էր՝ ազատականության հետ հավասարակշիռ փոխհարաբերություններ պահպանելու համար: Ասվածի ապացույցը պատմական փաստերը և ժամանակակից գործընթացներն են Արևելյան Եվրոպայում և հետխորհրդային հանրապետություններում, այդ թվում Հայաստանի Հանրապետությունում, որտեղ կառավարման ժողովրդավարական եղանակը ենթարկվեց տարաբնույթ ձևախեղումների: Դրան գումարվում է քաղաքացիական վերահսկողության լծակների բացակայությունը, որի պատճառով Հայաստանի Հանրապետությունում, որը սոցիալիզմից կտրուկ անցում էր կատարել կապիտալիզմի, կապիտալի նախնական կուտակման գործընթացը տեղի ունեցավ հանրային, պետական ունեցվածքի և հողի ու բնական պաշարների ոչ թափանցիկ և անարդար սեփականաշնորհման միջոցով: Ազատական գաղափարախոսության մակերեսային ընկալման և ոչ նպատակային կիրառման հետևանքով Հայաստանի Հանրապետությունում ժողովրդավարական կառավարման համակարգի ձևավորումը շեղվեց տրամաբանական ընթացքից, որն իր արտացոլումը գտավ նաև սահմանադրության և օրենսդրության մեջ (ՀՀ Սահմանադրության մեջ բացակայում է հանրաքվեների միջոցով անմիջական ժողովրդավարության հնարավորությունը, հստակ տարանջատված չեն գործադիր, օրենսդիր և դատական իշխանությունները, բացակայում են ազգային և սոցիալական պետություն կառուցելու

երաշխիքները և օրենսդրական հիմքերը) [11]: Տնտեսության մեջ ծայրահեղ ազատականության դրսևորումները և դրանից առաջացած սոցիալական բևեռացումը խափանեցին ժողովրդավարության ամրապնդման համար անհրաժեշտ սոցիալական համերաշխության և արդարության միջավայրի, քաղաքացիական հասարակության և արդյունավետ գործող կառավարման համակարգի ձևավորման գործընթացը: Փաստորեն, Հայաստանի Հանրապետությունում թեև առկա էր ժողովրդավարության հաջողության առաջնահերթ նախապայմանը՝ բնակչության ազգային միատարրությունը, սակայն քաղաքականության մեջ այն դադարեց գործոն լինելուց, երբ ժողովրդավարությունը ստորադասվեց ազատականությանը: Ազատականությունը, թերևս, միակ գաղափարախոսությունն էր, որ Հայաստանի նորանկախ Հանրապետության իշխանությունների կողմից ընդունվել էր անվերապահորեն և դրվել էր ոչ միայն երկրի տնտեսական զարգացման հայեցակարգի, այլև հասարակական հարաբերությունների հիմքում՝ խեղաթյուրելով և նսեմացնելով ժողովրդավարության էությունը հանդիսացող հավասարության գաղափարը:

Ազատականության հիմքում «մրցակցող անհատականությունների մշակույթն» է, որն ապահովում է տնտեսական առաջընթաց, իսկ «հավաքական կյանքի մշակույթը», որը բնորոշ է ժողովրդավարությանը, նպաստում է «կարգին ու կարգավորվածությանը,- նշում է փիլիսոփա Էդուարդ Հարությունյանը,- վերոնշյալ երկու իրարամերժ, բայց փոխլրացնող մշակույթները համարվում են ժամանակակից հասարակության հիմնական համակարգաստեղծ գործոնները» [12, էջ 75-76]: «Իրարամերժ, բայց փոխլրացնող մշակույթների»՝ ժողովրդավարության և ազատականության միջև հակասություններն ավելի խորանում են, երբ անձի ազատության և հանրային շահի սահմանը որոշող ուղեցույցները չեն հենվում բարոյական հաստատուն արժեհամակարգի վրա: Պետք է նկատել, որ ժամանակի և տարածության մեջ

անձի ազատության հասարակական և փիլիսոփայական ըմբռնումը տարբեր է եղել: Ազատականության գաղափարախոսության հայտնի դեմքերից մեկը՝ անգլիացի փիլիսոփա Ջոն Միլը, 19-րդ դարի կեսերին նշում էր «մեծամասնության» բռնատիրության վտանգների մասին: Նրա կարծիքով՝ հասարակությունն ինքնին բռնություն է՝ հավաքականության բռնությունն անհատի նկատմամբ: Միննույն ժամանակ, նա կարևորություն է տալիս սահմանին, որտեղ վերջանում է մեկ անձի ազատությունը և սկսվում է մյուսինը՝ առանձնապես կարևորելով նրանց իրավունքները, ովքեր ունեն պաշտպանության կարիք [13, ք. 4-6]: Անշուշտ, անհատի և հասարակության փոխհարաբերությունները պայմանավորված են առաջին հերթին հասարակության բնույթով: Քաղաքացիական հասարակության առանձնահատկությունն այն է, որ անձը կարևորվում է որպես քաղաքացի, որն ունի իրավունքներ և պարտականություններ և մասնակից է երկրի կառավարմանը: Ի տարբերություն անձի, որի ազատություններն ու շահերը կարող են հակասել հանրային, ազգային շահերին, քաղաքացու և հասարակության շահերը լրացնում են միմյանց: Սակայն ազատականության սուբյեկտը անձն է կամ անհատը և ոչ թե քաղաքացին: Այս առնչությամբ ուշադրության է արժանի հասարակագետ Գազիկ Մոդոմոնյանի «Անհատն ընդդեմ քաղաքացու» հոդվածը, որտեղ որպես անհատի և հասարակության միջև գոյություն ունեցող հակասության լուծման բանալի կարևորվում է քաղաքացու գործոնը: Հակասությունը վերանում է, երբ անհատը դառնում է քաղաքացի: «Առանց անկախ հասարակության անկախ մարդիկ չեն լինում, - գրում է գիտնականը: Հասարակության անկախությունը պահանջում է գիտակցական և մշտապես ու խորությամբ գիտակցվող ինքնորոշում: Այդպիսի հասարակությունը միայն իր բոլոր անդամների ընդհանուր ու նպատակասլաց ջանքերի վարձատրյալ արդյունքը կարող է լինել»: Եթե ազատությունը, որը համարվում է ազատականության գլխավոր

առանձնահատկությունը, առաջնահերթ կարևորություն ունի մարդու համար, ապա նույնքան առաջնային պետք է համարվի հավասարությունը, որը ժողովրդավարության հատկանիշն է: Ժողովրդավարությունը չի մերժում ազատությունը, այլ հակառակը՝ «հավաքական կամքը» կապված է ազատ քաղաքացիների կամքի ազատ արտահայտման հետ. ընտրությունների միջոցով քաղաքացու կամքի արտահայտումը և, ընդհանրապես, մարդու հիմնարար իրավունքներն ու ազատությունները ժողովրդավարության գլխավոր առանձնահատկություններն են: Սակայն ազատականությունը մերժում է հավասարության գաղափարը: Հավասարությունը երբեք չի եղել ազատականության հատկանիշ: Հետևաբար, «ազատությունը» և «հավասարությունը» հայտնվում են անհավասար պայմաններում, որտեղ ազատությունն ընդունելի է ինչպես ժողովրդավարության, այնպես էլ ազատականության, իսկ «հավասարությունը»՝ միայն ժողովրդավարության կողմից: Երբ այդ երկու տարբեր գաղափարախոսությունները՝ ժողովրդավարությունը, որտեղ ժողովրդի կամքն է առաջնային, և ազատականությունը, որտեղ անհատի շահն է գերակա, միավորվում են մեկ՝ «ազատական ժողովրդավարություն» արհեստածին հասկացության մեջ, խնդիրը, քողարկվելով, խորանում է:

Խորհրդային Միության փլուզումը և խորհրդային ճամբարի երկրներում սոցիալիստական հասարակարգի պարտությունը, թվում է, պետք է նշանավորեր ազատականության համընդհանուր հաղթանակը [14, c. 4], երբ աշխարհում այլևս ոչինչ ազատականությանը չէր խանգարում՝ հաստատվելու և ապացուցելու իր ճշմարտացիությունը: Տեղի ունեցող հասարակական և քաղաքական փոփոխություններն առիթ են հանդիսանում նորովի անդրադառնալու հեզելյան «պատմության ավարտի» թեմային: Այդ տարիներից Ֆրենսիս Ֆուկույաման կանխատեսում է մեկ ներդաշնակ, սակայն բավական «տխուր» հասարակության գոյության հնարավորությունը: «Մենք,

հնարավոր է, դառնում ենք «պատմության ավարտի» ականատեսը, որը նշանակում է մարդկության զարգացման գաղափարախոսական ժամանակաշրջանի ավարտ և արևմտյան ազատական-ժողովրդավարության համընդհանուր հաստատում», - գրում է նա: Միննույն ժամանակ, միմյանց հաջորդող տնտեսական և առաջին հերթին բարոյական ճգնաժամերը ցույց են տալիս, որ ազատական-ժողովրդավարությունը մարդկության և ազգերի համար ապահով ապագա կերտելու այնքան էլ հուսալի գործիք չէ, իսկ «հետմոդեռն» հասկացության առաջացումը և փիլիսոփայական տեսության զարգացումը վկայում են, որ ժամանակակից քաղաքակրթությունը, միգուցե, անցել է իր սահմանագիծը: Երբ վերացավ սոցիալիզմի կերպարով «արտաքին թշնամին», ավելի անկաշկանդ սկսեցին բացահայտվել ազատականության և կապիտալիզմի ներքին հակասությունները: Դեռևս 20-րդ դարի 40-ական թթ. Շումպետերը, որը հայտնի էր իր ազատական հայացքներով, «Կապիտալիզմ, սոցիալիզմ, ժողովրդավարություն» գրքում կապիտալիզմի փլուզումը համարում է անխուսափելի, որովհետև այն իր նկատմամբ առաջացնում է համընդհանուր թշնամանք [6, c. 61]: Ներկա հասարակական և քաղաքական իրադարձությունների համապատկերում կապիտալիզմի ապագայի նկատմամբ Շումպետերի հոռետեսությունն ընկալվում է բավական արդիական: Կապիտալիզմի գլխավոր արժանիքը նա համարում է մարդկանց նախաձեռնողականության խթանումը՝ նշելով, սակայն, որ կապիտալիզմի ինքնառնչացման հակումը կլանում և վերացնում է նաև այդ արժանիքը: Որպես ապացույց նա նշում է ընտանեկան փոքր ձեռնարկությունների՝ խոշորներին կուլ գնալու փաստը: Եվ երբ արդեն խոցելի է դառնում «սրբություն սրբոց» սեփականության իրավունքը, ազատականությունն, այլևս չունենալով բարոյական հենարան, զրկվում է իր գլխավոր գործառույթից: Դա նշանակում է, որ կապիտալիզմը հրաժարվում է իր որդեգրած բարոյական սկզբունքների մի մասից՝ դրա-

նով իսկ առաջացնելով հակաազատական հասարակական միջավայր [6, c. 142]: «Ազատ շուկայական» կամ «բնական ազատության» պայմաններում, երբ ուժեղը հաղթում է թույլին, պետք է օրինաչափ համարել, որ խոշոր բիզնեսը պետք է հաղթի փոքրին, հզոր պետությունը՝ թույլ պետությանը, կապիտալիզմը վերաճի իմպերիալիզմի և այլն: Այս առնչությամբ ուշադրության է արժանի 19-րդ դարի հայտնի տնտեսագետ, փիլիսոփա Ֆրիդրիխ Լիստի տեսությունը, որտեղ նա հիմնավոր փաստարկներով մերժում է տնտեսական հարաբերություններում ընդունված ազատական դրույթը, որ «բացը» բարիք է, իսկ «փակը»՝ չարիք: Նա ապացուցում է, որ ազատ շուկայական տնտեսության «բաց» հարաբերություններում շահում է կողմերից մեկը, այն, որն ունի շուկայական տնտեսության ավանդույթների վրա կառուցված կայուն և արդեն զարգացած համակարգ: Նա գտնում է, որ ազատ շուկան միջազգային առումով ձեռնտու է միայն այդ ասպարեզում առաջատարներին, իսկ մյուսներն այլ ճանապարհ, տնտեսական «բաց» հարաբերություններում կուլ գնալուց բացի, չունեն: Սակայն, միևնույն ժամանակ, գիտնականը, դեմ լինելով մեկուսացմանը, կարևորում է տնտեսական բաց հարաբերությունները հավասարների միջև: Նա նաև առաջարկում է միջազգային ազնիվ հարաբերություններ, երբ հզոր տերությունները բարեգործ չեն ձևանում փոքրերին ոչնչացնելիս, իսկ փոքրերը կարողանում են միավորվել՝ ստեղծելով «մեծ տարածությունների ավտարկիա» [15]: Ազատականությունն իրավամբ անվանում են «կապիտալի կուսակցություն» [16, c. 189]: Ֆինանսական կապիտալը, որն ազատ է տեղաշարժման մեջ, թվում է՝ պետք է հայրենիք չունենա: Սակայն դա բավական հարաբերական և խաբուսիկ պատկերացում է մի նյութական երևույթի մասին, որը կուտակման հակում ունի: Միևնույն ժամանակ, «հայրենիքը» նույնպես, որպես ներկա իրողություն, որպես պետություն՝ իր ֆիզիկական տարածքով, չի կարող գոյություն ունենալ առանց կապի-

տալի: Հայտնի է նաև, որ ազատ շուկայական տնտեսության պայմաններում կապիտալին բնորոշ է պրոգրեսիվ աճը: Հետևաբար, կապիտալի համար ինքնըստինքյան հայրենիք են դառնում հարուստ երկրները: Միջազգային տնտեսական հարաբերություններում տեղի է ունենում կապիտալի բևեռացում, որը «նպաստում» է մոլորակի սոցիալական բևեռացմանը: Հետևաբար, կարելի է եզրահանգել, որ ազգայետության գաղափարական հենասյուններից մեկը՝ ազատականությունը, երբ չի հավասարակշռվում մյուս երկու հենասյունների՝ ժողովրդավարության և ազգայնականության հետ, ունենում է ծայրահեղ դրսևորումներ՝ առաջացնելով տնտեսական ճգնաժամեր և սոցիալական լարվածության մթնոլորտ, որն իր հերթին մասնատում է ազգը և ստեղծում անհաղթահարելի խոչընդոտներ ազգ-պետության զարգացման ճանապարհին:

Ի տարբերություն ժողովրդավարության, որը, լինելով ազգ-պետության կառավարման համակարգ, պիտանի չէ անդրազգային կառույցներում և դժվար է հարմարվում համաշխարհայնացման պայմաններին, ազատականության և համաշխարհայնացման ժամանակակից միտումների միջև հակասություն չկա: Հակառակը, հակադրվելով ժողովրդավարությանը՝ ազատականությունը նպաստում է մշակութային և տնտեսական համաշխարհայնացման գործընթացներին: Սակայն որոշակի հակասություն, այդուհանդերձ, առկա է ազատականության և ներկայիս հետարդյունաբերական հասարակության և «հետմոդեռնի» փիլիսոփայության միջև: Ազատական գաղափարախոսությանը բնորոշ է անհատապաշտությունը (ինդիվիդուալիզմը), իսկ հետարդյունաբերական, բարձր տեխնոլոգիաների և տեղեկատվական հասարակությանը հատուկ է զանգվածային սոցիոմշակույթը, որտեղ մարդու՝ որպես անհատի, իրավունքներին և ազատություններին տեղ չի հատկացվում: Ինչպես նկատում է ֆրանսիացի փիլիսոփա Ժան Բոդրիյարը, «զանգվածի գործառույթը հիշեցնում է ահռելի,



մութ անդունդ, որն անխնա կլանում և խեղում է իր մեջ իրեն մոտեցող էներգիայի և լույսի բոլոր շողարձակումները» [17, c. 14]: Փաստորեն, ժամանակակից «փոփ արթի», «թոք շոուների», «վիրտուալ հաղորդակցման ցանցերի» քաղաքակրթությունն առաջարկում է մի գաղափարախոսություն, որի առանցքում զանգվածն է, ապագային հասարակությունը և, հետևաբար, ազատության բացակայությունը, քանի որ զանգվածը չի կարող լինել ազատ կամ անազատ՝ նրա առանձնահատկությունը հատկանիշներից զուրկ լինելն է: Եվ հենց անհատի դերի կարևորման առումով՝ ներկայիս «հետմոդեռնի» փիլիսոփայության և ազատական գաղափարախոսության միջև կա էական տարբերություն և անհամապատասխանություն: Ընդհանրապես, «հետմոդեռնը» և ազգ-պետությունն անհամատեղելի են: «Հետմոդեռնը», որը «մոդեռնի» մերժումն է, բնականաբար, մերժում է դրան առնչվող ցանկացած երևույթ, ներառյալ՝ ազգ-պետությունը:

Քաղաքական փիլիսոփայության մեջ այսօր ավելի քան արդիական է կառավարման նոր, արդյունավետ ուղիների որոնման թեման: Թերևս, պետք է համաձայնել անգլիացի փիլիսոփա Էրիկ Հոբսբաումի հետ, որը համոզված է, որ 21-րդ դարի քաղաքական, հասարակական, տնտեսական ճգնաժամերն այլևս հնարավոր չէ հաղթահարել զուտ ազատ շուկայական հարաբերություններով և զուտ ազատական ժողովրդավարությամբ, և որ անհրաժեշտ է ստեղծել հանրայինի և մասնավորի, պետական միջամտության, վերահսկողության և ազատության նոր համադրություն [18]: Ժողովրդավարության և ազատականության միջև առաջացած բազմաթիվ անլուծելի թվացող խնդիրները, որոնք արգելքներ են առաջացնում քաղաքական ազգի գործառության մեջ, ի վերջո կարող են հանգուցալուծվել: Աշխարհն այսօր տնտեսական և մշակութային համաշխարհայնացմանը զուգընթաց՝ ազգային ինքնությամբ պետությունների կազմավորման մի նոր ժամանակաշրջան է մուտք գործում: Ազգային ինքնորոշման

իրավունքը երկարատև դադարից հետո իր երկրորդ շնչառությունն է կարծես ստանում: Իսկ, ինչպես արդեն նշել ենք, ազգային համաձայնությամբ ազգ-պետության (քաղաքական-քաղաքացիական ազգի) մեջ ժողովրդավարության և ազատականության նպատակների և գործառույթների միջև հակասություններ չեն առաջանում, որովհետև իրականում մարդու իրավունքն ու ազատությունները, քաղաքացու անձնական շահը և ազգային ու պետական շահը ոչ թե միմյանց հակադիր են, այլ պայմանավորված են միմյանցով: Ընդհանրապես, փիլիսոփայական տեսանկյունից մասի և ամբողջի միջև հակասություն չի կարող առաջանալ: Ուժեղ, զարգացած, ժողովրդավարական պետություն ունենալը, ինչպես նաև ազգային ինքնության պահպանումը յուրաքանչյուր քաղաքացու անձնական շահն է, ինչպես նաև արժանապատիվ, ազատ քաղաքացիներից բաղկացած հասարակությունը յուրաքանչյուր պետության հարստությունն է՝ նրա մարդկային ու սոցիալական կապիտալը: Հասարակական համակարգի հավասարակշռությունը պահպանելու և համընդհանուր բարօրության երկիր ունենալու համար, թերևս, անհրաժեշտ է առաջնորդվել ժամանակի քննությունը հանձնած «ոսկե միջինի օրենքով»: Ինչպես արդեն նշել ենք, ժողովրդավարության և ազատականության համատեղելիության և համակարգային հավասարակշռության կարելի է հասնել ազգային միասնության պայմաններում, որի համար անհրաժեշտ է առնվազն ազգ-պետության (քաղաքական ազգի) գործառության մյուս գործոնի՝ ազգային մշակույթի և քրիստոնեական բարոյականության վրա խարսխված ազգային գաղափարախոսության առկայությունը:

*Հունիս, 2013թ.*

### Աղբյուրներ և գրականություն

1. *Манн М.*, Нации-государства в Европе и на других континентах//Нации и национализм, М.
2. *Хантингтон С.*, Третья волна. Демократизация в конце XX века / М., 2003.

3. *Луций Анней Сенека*, Нравственные письма к Луцилию, Кемеровское книжное изд., 1986.
4. *Хабермас Ю.*, Демократия. Разум. Нравственность: Лекции и интервью, М., 1992.
5. *Քրիստ Ժան-ժակ*, Հասարակական դաշինքի մասին, Ե., 2000:
6. *Шумпетер Й.*, Капитализм, социализм и демократия, М., Экономика, 1995.
7. *Линд М.*, В защиту либерального национализма//Foreign Affairs, 1994, №3.
8. *Шмиттер Ф.*, Более либеральная, предлиберальная или постлиберальная? <http://old.russ.ru/journal/predely/97-10-28/shmitter.htm>].
9. *Шмитт К.* //www.litres.ru/karl-shmitt/gosudarstvo-i-politicheskaya-forma/
10. *Токвиль Алексис де*, Демократия в Америке, Книга первая, М., 1992.
11. ՀՀ Սահմանադրություն, 2005//www.parliament.am/:
12. *Հարությունյան Է.*, Ազգային ինքնություն և կյանքի մշակույթ, Ե., 2004:
13. *Mill J.*, On Liberty, Dover Thrift Editions, UK, 2002.
14. *Фукуяма Ф.*, Конец истории и последний человек, изд. АСТ, 2004.
15. *Лист Ф.*, Национальная система политической экономии //Национальность и экономия наций// [www.economics.kiev.ua](http://www.economics.kiev.ua)
16. *Мизес Людвиг фон*, Либерализм, М., 2007.
17. *Бодрийар Ж.*, В тени молчаливого большинства, или конец социального, Екатеринбург, 2000.
18. Хобсбаум Э. Капиталисты перестали бояться// “Гардиан” 16 января 2011, <http://www.guardian.co.uk/books/2011/jan/16/eric-hobsbawm-tristram-hunt-marx>.

## ИДЕОЛОГИЧЕСКИЕ ОСНОВЫ И ФУНКЦИОНАЛЬНЫЕ ОСОБЕННОСТИ НАЦИОНАЛЬНОГО ГОСУДАРСТВА

*Карине Акопян*

Резюме

Дискуссия о свободе и равенстве продолжается на другом уровне – в споре демократии и либерализма. Существует принципиальное различие между этими идеологиями, опирающимися на две разные концепции отношений между человеком и обществом. Цель данной статьи – рассмотрение взаимодействия демократии, либерализма и национализма в контексте функциональных особенностей национального государства. Центральная идея работы – это утверждение, что в национальном государстве противоречия возникают в связи с отсутствием баланса и гармонии между демократическими, либеральными и национальными идеологиями.